

Statua di Betico Croes ta muestra di su gran balor y lucha pa su pueblo

Riba 19 di Maart 1989, Fundacion Betico Croes, cu orguyo y gran satisfaccion a develá un statua conmemorativo di e lider político Arubano cu a logra convertí e soño di Pueblo Arubano den un gran realidad.

Y awe Aruba tin su Status Aparte dentro di Reino danki na su esfuerzo, su sacrificio y su dedicacion na e causa pa cual e tabata dispuesto na ofrecé su vida.

Cu develo di un statua lantá na su honor, Fundacion Betico Croes, na nomber di e pueblo Arubano a rindi un homenage na e libertador Betico Croes, kende a lucha incansabel contra forzanan local y extranhero pa cumpli cu e deso di su pueblo, dunando e símbolonan di libertad; himno y bandera.

Símbolonan cu ta para testigo di e identidad di un pueblo orguyoso di su herencia cultural, su historia y su amor pa libertad.

Fundacion Betico Croes na nomber di Pueblo Arubano a develá e statua cu lo para firme na e plaza cu tin su nomber, mes firme cu Betico Croes a para contra tur obstáculo, tur contratempo, te logra pa Aruba un libertad cu e tabata anhelá pa mas di 50 aña.

E ta poco pa ofrecé un Libertador, pero e ta representá e gran amor cu Pueblo Arubano ta sinti pa su Lider, y e lo para ey, como símbolo di union, di paz, di amor pa libertad.

Mañan recordando natalicio di e gran persona aki lo ta bon pa e pueblo durante dia bai un rato na su statua y reflexá y pensa kico realmente tabata e gran lucha di Betico Croes.

Un gran homber no solamente pa su famfa pero pa henter e pueblo di Aruba.

Historia di un lucha, recordando Betico

Ser revolucionario
No ta su intencion
Pero forzosamente
E lucha a exigí
Pará dilanti pueblo
Betico a demostrá
Y cu caracter firme
Dirigiendo su nacion

Luchando pa ser liber
Betico a demostrá
Cu tur nos idealnan
Por ser realizá
Teniendo un referendum
P'asina comprobá
Hulanda y Antiyas
Nos kier nos libertad

Traidornan di nos pueblo
Hudasnan bon pagá
A purba kibra e lucha
Cu pueblo a iniciá
Yudando e enemigo
Bendiendo nos nacion
Pa puesto di ministro
A cometé traicion

E pueblo Arubano
A dreña den accion
Pa reclamá derecho
Pa busca salvacion
Armá cu carabina
Polis a maltratá
Un pueblo inofensivo

Un pueblo atrapá

Hulanda a habri porta
Aruba a ser scuchá
Su pueblo el a salba
C'un plan bon prepará
Enemigonan ta rabia
Ta keda babucá
Cu Betico si a logra
Un Aruba liberá

Cu floman y bandera
Nos pueblo a acudí
Cu húbilo y grandeza
Nan a ser ricibí
Cu canto di nos himno
Nan a ser gradicí
E héroenan di Aruba

Pa e mision cumplí

Nan odio y envidia
No por ser dominá
Ta trata cu venganza
P'e lider ser matá
Riba veld di Winston
Un bala a trasasá
E curpa di Betico
Nos lider tan stimá

Awe mas cu nunca
Nos pueblo ta cuné
Ni un ora ni un momento
Hamas lo bandoné
Cu brfo nos ta lucha
Cu ánimo y balor
Na lado di Betico
Nos gran libertador